

2 KOVEENKARIEGI

Eriseo ipugairira Eriashi

2¹Impogini agaka ikogantakarira Tasorintsi iramanakerira Eriashi enoku amanakerira omarane tampia ompishinkutakotanakerira. Yogari Eriashi itentanakari Eriseo iponiaiganaka Jirigareku ⁴... iaigake Jerikoku.
⁶Impo ikantiri:

—Maika ario pinae aka, ikantakena-tari Tasorintsi noatakera Jororanku.

Irirori ikantiri:

—Garatyo napakuimatimpi.

Ovashi yogiatanakeri iaigakera piteniro ⁷yaratinkaigakera otsapiaku Jororan. Impo iatashiigakeri 50 irogamereegi kamantantaigatsirira ineventakoigakarira. ⁸Impo yogari Eriashi inoshikakero imanchaki yogirira enoku yapitivitakero ipasaatantakarora Jororan. Oga okenake opiriatanake niganki ovashi ikenaianakera imonteaignakara. ⁹Impo imonteaignakara ikantiri Eriseo:

—Maika tekyara iramena Tasorintsi, atsi pinkantakenara tata pikogake. ¿Tyara nonkantakempi?

Ikanti irirori:

—Onti nokogake pinkañotagakenara nantinirika pitomi pitsitikitakerira kameti nompugaempiniri viro nonkamantantavagetakera. ^a

¹⁰Irirori ikantiri:

—Ojojoo okomuvageta pikantakerira maika, kantankicha ariorika pineavakenarika iramanakenara Tasorintsi ario pinkante ontsatagakempa pikantakerira maika.

¹¹Impo ikenaianakera anta iniavaka-gaiganakara katsiketyo ikoneatimoigakeri kavayo inoshikaiganakero oshigakotantaganirira yontainagakerira piteniro. Yogari kavayo ontiri inoshikagakerira onti okañotimotakari tsitsi. Impo otampiatapaake tampia jiririririri opishinkutakotanakeri Eriashi pigiriririri akyo amanakeri enoku. ¹²Irorompa inavakerira Eriseo ikaemamatanaketyo: “iAmaa! iAmaa, pairotyto pipugamentagakeri iseraereegi kañomataka vintinirikatyo soraroegi pairorira itovaigava-geigi!” Impo tera ineaeri.

Impo ovashi itisaraakomatanaketyo imanchaki niganki tseerererere. ¹³Yaganairo imanchaki Eriashi shirianankicharira yamanairora iataira yaratinkapaa-kera otsapiaku Jororan. ¹⁴Yapitivitakero ipasaatantakarora Jororan ikanti: “Atsi noneakera maika irogikoneatimotakenara Tasorintsi iragaveane ikañotagakenara yagaveakagirira Eriashi.” Irorotyto ipasaatakerora ogatyto okenake opiriatanai imonteanara.

¹⁵Impo ineaigavakerira irogamereegi kamantantaigatsirira naigankitsirira Jerikoku ikantaigi: “Maika yokari Eriseo

a 2.9 Irinianeku virakocha okanti: —*Quiero recibir una doble porción de tu espíritu.* Kamosotero Tsitikitankitsi *Glosarioku.*

onti ikañotasanaotaari Eriashi.” Ovashi iaigake itonkivoigavakarira yompata-kaventaigavakarira.

Eriseo intiri Naaman

5¹Aiño paniro itinkamiegi isoraroegite koveenkari Suriakunirira paitacharira Naaman. Yogari koveenkari itasanovagetaritoy kara ishineventakari ineakeritari yomanataigarira kisaigakeririra Suriakunirira omirinkatyo yagaveaigiri, irirotari gaveakagakeri Tasorintsi. Kantankicha inti vesegasenari. ²Antari ivankoku aiño paniro ananeki atake antarokotitanake. Okyara onti yagaigakitiro soraroegi Suriakunirira yomanataigakitarira iseraeeregi ovashi yamaiganakerora anta omperatarora itsinanetsite Naaman.

³Impogini irorori okantiro nampitarorira:

—Antari iriatera pisuraritsite inkantetira kamantantatsirira timatsirira Samariaku irovegaerira irovegaerityo.

⁴Impo yogari Naaman iatake ikamantakerira koveenkari okantakerira.

⁵Irirori ikantiri:

—Iroroventi atsi plate kamosotakiteri. Narori nontsirinkavakeneri sankevanti igoveenkariegi iseraeeregi.

Impo irirori iatanake, yamagetanake 30,000 korikimenta yovetsikantunkanirira perata, aikiro 6,000 korikimenta yovetsikantunkanirira kori impo aikiro 10 manchakintsi. ⁶Yamanakero aikiro sankevanti irashi igoveenkariegi iseraeeregi itsirinkakeneririra koveenkari Suriakunirira okanti: “Maika notsirinkakempi nonkamantakempira onti notigankavitakeri kara Naaman povegaerira yovesegasetakara. Irirori inti itinkami nosoraroegite.”

⁷Impo yogonketakara ipapaakeri koveenkari iniavantakerora. Iroro yagatakera iniavantakerora yovankinavagetanakatyo itisaraitarotyo imanachaki tseerererere ikanti: “¿Matsi naro

Tasorintsi nagaveakera nogamagantakera aikiro noganiantakera kameti intigankakerira novegaerira yovesegakara? Ikantavintsatakanirorokari yamatagakara ineakera garika novegiri iripokashitakenara iromanatakenara.”

⁸Antari ikemakotakerira kamantantatsirira Eriseo itigankake inkantakitenkaira: “¿Tyara okantakara povankinavagetanakara, pitisaraakerora pimanchaki? Atsi kanteri Naaman iripokakera naroku impo irogotake arisanoniroro aiño kamantantatsirira aka iseraeeregi.”

⁹Yogari Naaman iatake ivankoku Eriseo ikenantanakero ishigakotantarira itentaigakari pashini shigakoiganankicharira kavayoku. Yaratinkapaake sotsimoroku ivankoku Eriseo, ¹⁰kantankicha irirori onti itigankake paniro ironampiria ikantakerira:

—Ikantake kamantantatsirira Eriseo plate pinkaatakera Jororanku pinkiviatake 7 impo poveganaempa.

¹¹Irirori ikisamatanakatyo ikantanakera:

—Kogapagetyo nokantake maika inkontetanake ivankoku iraratinkakera iriniakerira itasorintsite impo intsagatakena novesegakara oga nonkenake noveganaempa. ¹²Aityoniroro anta Iramashikoku nia saanaari paio avisakero Jororan. Irorora vegantatsine nia irorometryo nonkaatake Avana ontirika Parepare noveganaempara.

Impo ikيسانanotanakatyo kara akya itsatai. ¹³Kantankicha yogari inampinaegi iniaigakeri ikantaigiri:

—Apa, ¿matsi tatamera inkantakempi pashini povetsikakera gara pikematsatiri? Ariompari maika intagatiri ikantakempi pinkaatakera poveganaempiniri paio pintsatagakero.

¹⁴Impo irirori ovashi iatake ikaatakera Jororanku ikiviatakera 7 itsatagakera ikantakeririra Eriseo ogatyo ikenake yoveganaka paa vegasanovagetaatyokara. ¹⁵Ovashi ipiganaka ivankoku

Eriseo itentaiganakarira maganiro itentaigakarira ikantapaakerira:

—Maikari maika nogotake mameri pashini tasorintsi kañotakemparineririra yoga Tasorintsi pikematsaigirira viroegi iseraereegi. ...^b

Asuriakunirira yagaveaigakerira iseraereegi

17¹Impogini aganakara 12 shiriagarini ipegakara Akase igoveenkariegite iyashikiiganakerira Jora yogari Oseashi itomi Era ipegaka igoveenkariegite iseraereegi. Onti ipegaka koveenkari anta Samariaku 9 shiriagarini. ²Irirori yovetsikake terira onkametite teranika intsatagero ikantagetirira Tasorintsi, kantankicha tera paio inkañoigempari iketyorira pegaigankicha koveenkari pairotyo yogagaigaka.

³Impogini yogari igoveenkariegite Asuriakunirira paitacharira Saremanasare ipokashitakeri yomanatakarira yagaveakeri ovashi yashintaigakeri iseraereegi ikantaigakeri omirinka shiriagarini impaigakerira koriki. ⁴Kantankicha impogini yogari Oseashi tenige impakagantaeri, aikiro itigankake iriaigakera iriniaiguterira igoveenkariegite Ejipitokunirira paitacharira So inkantaigakerira irimuigakerira ganigera yashintaigaari Saremanasare. Kantankicha impo yogotakera irirori yagakagantakeri yashitakotagantakerira. ⁵Ovashi ipokaiigake isoraroegite itsotenkagiteaiganakarora itimaigira iseraereegi yonkuatakoigakarora Samaria mavati shiriagarini. ⁶Antari aganakara 9 shiriagarini ipegakara koveenkari Oseashi yogari igoveenkariegite Asuriakunirira yagaveaigakeri iseraereegi Samariakunirira ovashi yamageiganakeri anta Asuriaku yashintaigakarira. Onti ikantaigakeri

intimaigapaakera Araku, Gosanku otsapiaku nia paitacharira Avoro, ontiri aikiro apatogetara pankotsi itimaigira meroegi.

⁷Onti ikañoigakeri maika Tasorintsi ineaigakeritari tera inkematsaigeri. Ineaigavetakatyo yagaigaatirira Ejipitoku yovetsikagemataketyo posante terira oneimagetenkani yatsipereakagakerira paraon igoveenkariegite Ejipitokunirira kameti irapakuaiigakerira, kantankicha impogini inti ipegageiganake pashini itasorintsiegite, ⁸aikiro yogiatakoiganaakeri yogameigarira yogaegi timageigavetankicharira Kanaanku, irirotari iokaigakerira Tasorintsi kameti irirokyaniri timaigankitsine. Yogiatakoigakeri aikiro igoveenkariegite.

⁹Onti ikematsatamampegaigakeri Tasorintsi kogapage tera intsatagaigero ikantagetirira, ontityo yovetsikaigake itagantaganirira piratsi itsotenkavageigakerotyogaigakerora otishipageku tyarika kara itimaigakera. ¹⁰Aikiro yagaigake ogatsantsamapupageni mapu ontiri aikiro inchapoa ikañotagaigakarira ipegageigirira itasorintsite kogapage yogaratinkageigakero kara otishipageku ontiri aikiro otapinapageku inchato ogashimponi. ¹¹Itagaigakero kasankapaneri otishipageku onagetakera itagantaganirira piratsi yogiatakoiganakerira timaigavetankicharira kara iokaigakerira Tasorintsi kameti irirokyaniri timaigankitsine. Yovetsikagisevageigake pashini posante terira onkametite ovashi yotsimajaigakeri Tasorintsi. ¹²Ipegageigakeri pashini itasorintsiegite kantankicha iroro ikantaviigavetakaririra Tasorintsi ikantakera: “Gara pikañoigiro maika.”

¹³Impo yogari Tasorintsi ikantaigakeri kamantantaigatsirira inkanomajaigakerira iriroegi intiegiri aikiro iyashikiiga-

b 5.15 Antari ikamanaira Eriseo irirokya kamantantaatsi Jonashi. Kamosotero Jon. 1—3.

nakerira Jora inkantaigakerira: “Ikantake Tasorinti: ‘Pampakuaijanaerora povetsikagisevageigakerira, narokya pinkematsaigae pintsatagaigakerora nokantagetirira pairani noniaigakerira yashikiiganakempirira osarigagitetapaakera ontiri aikiro magatiro ikantaigakempirira kamantantaigatsirira kematsaiganarira.’” ¹⁴Kantankicha iriroegi teratyo inkematsaigeri, ariompatyo ishintiiganakeri ikañoiganakerira yashikiiganakeririra tera inkematsaigeri. ²²Atanatsityo yovetsikagisevageiganakerora magatiro terira onkametite yogotagaigakeririra pairani koveenkari Jerovoame, teratyo irapakuimaigero ²³kigonkero iokaigakerira Tasorinti parikoti itsatagakerora ikantaigakeririra okyara ikanti: “Garika naro pikematsaigi intririka pimpegageigake pashini pitasorintsite garatyo samani pitimagan-tsivageigi anta kipatsiku nompaiagakempirira. Ontityo iragaveaigakempi kisaigakempirira impo intivarokagisevageigakempi parikoti.” Irroegitari kamantanaigavetakari kamantantaigatsirira, kantankicha iriroegi teratyo inkematsaigeri ovasi okañotantakarira maika yagaveaigakerira kisaigakeririra yamaiganakerira igipatsiegitoku Asuriaku kigonkero maika.

²⁴Yogari igoveenkariegite Asuriakunirira ikantaigakeri Vavironiakunirira intiegiri aikiro pashinipagekunirira poniageigankicharira Kotaku, Avaku, Amateku ontiri Separevaimeku iriaigakera Samariaku intimaigakera impugaigakerira iseraereegi. Impo ario okañotaka.

²⁹Kantankicha tyarika kara itimageigapaake iriroegi onti yovetsikageigake itasorintsiegite yogantaigakarira otishipageku onagetakera itagantaganirira piratsi yovetsikaigakerira Samariakunirira.

³³Itagaigavetakeneri Tasorinti piratsipage kantankicha itentagantaigakaroty aikiro

ipomirintsiventaigarira itasorintsiegite irogishineigakerira kameti irishineventai-gakempariniri, teranika irapakuaigero yogameigarira anta iponiageigakara.

Ipegakara Esekiashi igoveenkariegite iyashikiiganakerira Jora

18 ¹Antari omavatanakara shiriagarini ipegakara Oseashi igoveenkariegite iseraereegi yogari Esekiashi itomi Akase ipegaka igoveenkariegite iyashikiiganakerira Jora. ²Antari itsititanakerora ipegakara koveenkari onti ishiriagakotaka 25 shiriagarini impo ipegaka koveenkari 29 shiriagarini anta Jerosarenku. Ogari iriniro onti opaita Avi, inti shintotaro Sakariashi. ³Yogari Esekiashi ikematsatakeri Tasorinti itsatagagetakero ikantagetirira ikañotakarira Iravi. ⁴⁻⁵Panirosanoty ikematsatakerira Tasorinti shintaigaririra iseraereegi iriro yogiakotaka. Teratyo intimumate pashini igoveenkariegite iyashikiiganakerira Jora kañotakemparinirira irirori. Iokagetakerotari magatiro itagantaganirira piratsi nagetankitsirira otishipageku, aikiro itimporokagetakeri yovetsikagetunkanirira ikañotagunkanira ipegagetaganirira tasorinti kogapage, aikiro itogagetakero inchatopage okañotagunkanirira itasorintsiegite paitacharira Asera. Aikiro itimporokakeri maranke yovetsikakerira Moiseshi pairani yovetsikantakarira verontse, ipegai-gakeritari iseraereegi itasorintsiegite ipaiigakeri Neosetan itagaiginiri kasankapaneri.

Igoveenkariegite Asuriakunirira ipokashiigakerira iyashikiiganakerira Jora

¹³Impogini aganakara 14 shiriagarini ipegakara Esekiashi koveenkari ipokashitakeri igoveenkariegite Asuriakunirira paitacharira Senakerive

yagapitsagetakerira apatogetara pankotsi negintetasanogetankicharira tantatsaitakogetankicharira. ¹⁷Impogini itigankaigakeri mavani inampinaegi intentaiganakemparira tovaini soraroege iriaigakera iromanataigakitemparira Esekiashi anta Jerosarenku. Onti iponiaiganaka Irakiseku. Impogini yagapairora ochoenitakera otantatsaitakotara Jerosaren ... ²⁸yaratinkake iniantanakarora irinianeegi iyashikiiganakerira Jora imaraenkarikatyo kara ikanti:

—Maika kemisantaigena nonkamantagakempira ikantakerira nogoveenkariegite pairorira yavisaenkavageti ikoveenkavageti. ²⁹Onti ikantake: ‘Tsikyanira yamatavinaigimpikari pigoveenkariegite Esekiashi inkantaigakempira impugamentaiganakempira ganiri nagaveaigimpi, gatanika yagaveimatananika naro. ³⁰Aikiro tsikyanira ikantaigimpikari: Impugamentaigakempira Tasorintsi ganiri yagaveaigimpi yashintaigimpira koveenkari Asuriakunirira. ³¹Inkantaigavetakempityo maika garatyo pikematsaigiri.’ ...

Tasorintsi ipugamentaigakerira iyashikiiganakerira Jora

19 ¹Impogini ikemakera koveenkari Esekiashi itisaraamatanakeroty imanchaki yogagutanakara tontaprokiri iatakera ivankoku Tasorintsi iniakerira. ²Impo ikaemaigakeri itinkamiegi tavagetimoigiririra paitacharira Eriakin intiri tsirinkimotiririra paitacharira Sevana intiegiri aikiro saseroroteegi igantagarira yantariiği pairani ikantaigakeri irogaguiganakemparora tontaprokiri iriaigakera inkamantaigakerira kamantantatsirira Isaiashi itomi Amoshi ³inkantaigakerira: ‘Ikantake Esekiashi: ‘Maika gaka ovankinavagetantakenkanirira, ikisaitakenatari isamatsanaitakena yogipashiventaitakena. Kañomatakatyo atsipereavagetira tsinane panikyara

omechotakotake impo tenigera oshintisetae ovashi tera imechote otomi ontityo ikamake tsompogi. ⁴Yogari Tasorintsi kantakanirira itimi pikematsatirira viro ikemakerorokari magatiro ikantakerira maika inampina igoveenkariegite Asuriakunirira itigankakerira irirori isamatsanatakerira aikiro intoenkakerira. Ariorika inkisashitakempari. Maikari maika piniakerira piniaventaigakenara naroege aiñokyarira nonaigai.’”

⁵Impo iriroegi iaigake ikamantaigakerira Isaiashi. ⁶Irirori ikantaigiri:

—Maika piaigae pinkantaigapaakerira tigankaigakempirira pinkante: ‘Ikantake Tasorintsi: Arioniroro ikañogakero maika itsoenkaigakenara inampinaegi Senakerive isamatsanaigakenara, kantankicha garatyo pitsarogi, ⁷nontasonkakotakeritari Senakerive ganigeniri ishintsitashitairo pokashitakerinerira inkemaketari niagantsi mintsarogakerinerira ovashi impiganae itimira. Ario kara irogakenkani imokoroankenkanira, narotari kañotagakerone maika.’

⁸Impogini yogari itinkami isoraroegite Senakerive ipiganaa inkamosotaerira. Onti iatake Irivanaku, ikemakotakeritari ario inake kara yomanatakara iponianakara Irakiseku. ⁹Impo ikemake Senakerive iripokashitakerira igoveenkariegite Etiopiakunirira iromanatakemparira itigankutaatyo aikiro inkantakerira Esekiashi ikantavakeri:

¹⁰—Onti pinkantaigakeri Esekiashi igoveenkariegite iyashikiiganakerira Jora pinkante: ‘Gara pikematsatiri pitasorintsite inkantakempirika oga Jerosaren garatyo yagaveimati yashintarora igoveenkariegite Asuriakunirira, ontitari yamatavinaigakempira. ¹¹Pikemakoigakeritari maganirori igoveenkariegite Asuriakunirira tyanirika itentaigaka yomanatavakagaigakera imirinkatyo yagaveaigakeri

ipogereai gakerira, teratyo intimumaige shintsitashiigakerineririra. ¿Ario vintirika gaveankitsine pishintsitashiigakerira?

¹²¿Matsi yagaveaigake itasorintsiegite ipugamentaiganakerira yogaegi ipogereai gakerira? ... ¹³¿Tyaniegirorokari maika igoveenkariegite Amatekunirira intiegiri Areparekunirira intiegiri Separevaimekunirira? Ario ikañoigaka igoveenkariegite Enakunirira intiegiri Ivakunirira ¿tyaniegirorokari maika?

¹⁴Impo yogonkeigakara itigankaigakerira ipaigapaakeri Esekiashi sankevanti itsirinkakeneririra. Impo yagatakera iniavantakerora iatake ivankoku Tasorintsi yamanakerora yampigireakerora iokotagakerira Tasorintsi. ¹⁵Impo iniakeri ikantiri: “Viro Tasorintsi shintaigaririra iseraereegi, nogotake pikantakani pinira aka pivankoku inaigakera kerovine pigajonakiteku. Paniro pikantakara viro pitasorintsitakera pavisavageigakeri maganiro koveenkaripage timaigatsirira kipatsiku, virotari vetsikakero inkite ontiri kipatsi. ¹⁶Maika nokogake pinkemasanotakenara noniakempira, aikiro nokogake pogasanotakera kavako pineagetakera tyara okantaka magatiro. Pinkemakerora ikantakerira maika Senakerive itsoenkakempira viro kantakanirira pitimi.

¹⁷Arisanoniroro ipogereai gaketakari maganiro yomanataigakarira, ¹⁸aikiro itagutaigakeri ipegageigirira itasorintsiegite, teranika intasorintsitumaige ontitari yovetsikaigakeri iriroegi onti yovetsikantaigakari inchato ontiri mapu neroty tyampa inkantaigakempa impugamentaigakempara itagantaigakaririra. ¹⁹Maika nokogake pimpugamentaigakenara pogavisaakoigakenara ganiri ipogereai gana Senakerive kameti irogoigakeniri maganiro arisano paniro pikantakara viro pitasorintsitakera.”

²⁰Impo yogari Isaiashi ikantakagantakeri Esekiashi ikantiri: “Ikantake Tasorin-

tsi shintaigaririra iseraereegi: ‘Maika nokemakempi piniakenara pikamantakenara tyara ikanti Senakerive igoveenkariegite Asuriakunirira, ³²neroty nokantantakarira maika garatyo yagaveimati iragatikakerora Jerosaren, aikiro garatyo imatsagatumataro chakopi. ... ³³Ontityo impigantanaemparo avotsi ikenantapaakarira, garatyo ipokumati aka Jerosarenku, ³⁴narotari pugamentakerone, narotari shintaro, aikiro intitari nosuretakotaka nomperane Iravi.’”

³⁵Impogini ochapinitanakera yogari Tasorintsi itigankakeri isaankariite inaigakera soraroegi Asuriakunirira yogamagaigakeri 185,000, impo okutagite-tamanakera itinajaigavetamanaka itovaire ineagiri kamavioigamatake ³⁶ovashi ipiganaa Senakerive iatai Niniveku ario inake kara. ³⁷Impogini iatake ivankoku itasorintsite paitacharira Niseroko ikanagaventakarira. Impo ipokashiigakeri itomiegi imokoroaigakerira. ...

Ipegakara koveenkari Manaseshi

20 ²¹Impo ikamanai Esekiashi irirokya pugairi itomi paitacharira Manaseshi.

21 ¹Antari itsititanakerora ipegakara koveenkari onti ishiriagakotaka 12 shiriagarini. Onti ipegakara koveenkari Jerosarenku 55 shiriagarini. Ogari iriniro onti opaita Epesuva. ²Impo irirori yovetsikake terira onkametite ikañoigakarira yogaegi timaigavetankicharira Kanaanku iokaigakerira Tasorintsi impugaigerira iseraereegi intimaigakera. ³Yovetsikage-tairotari itagantaganirira piratsi otishipageku iokagevetakarira iriri, aikiro yovetsikagetairo itagantaganirira piratsi ipunkanirira Vaare. Aikiro yagake inchapoa yovetsikantakarora pashini ikañotagakarora itasorintsiegite paitacharira Asera kañorira yovetsikake-

rira pairani Akave igoveenkariegite iseraereegi. Ikanagaventaigakari poreatsiri, kashiri intiri aikiro impokiro-page itagaigakenerira kasankapaneri. ⁴Ineavetakatyo ikantakera Tasorintsi: “Onti nontimake anta novankoku Jerosarenku”, kantankicha yovetsikage-take itagantaganirira piratsi anta tsoompogi ivankoku. ⁵Yovetsikagetake-neri aikiro poreatsiri, kashiri intiri aikiro impokiro-page yogaigetakero kara pampatuiku ivankoku Tasorintsi, onti yogantagetakero pituitetiro otantatsaita-kotunkanirira.

⁶Aikiro itagakeneri itomi itasorintsite, ontiri aikiro imatsikatantake. Kantanki-cha tera patiro onake oka, yaventaigaka-rityo aikiro niaigiririra kamatsirini intiegiri pashini kamantantaigatsirira tyara onkantanakempa impogini. Yovashigakovaetanakaroty yovetsika-gisevegetanakera terira onkametite ovashi yotsimaakeri Tasorintsi. ¹⁸Impo-gini ikamanai. Onti ikitataagani aiñoni ivankoku. Ogari ivanko onti onake pankirintsishiku paitacharira Osa. Impo irirokya pugairi itomi paitacharira Amon. ¹⁹Yogari Amon onti ishiriagakotaka 22 shiriagarini itsititanakerora ipegakara koveenkari. Onti ipegaka koveenkari piteti shiriagarini anta Jerosarenku. Ogari iriniro onti opaita Mesoremete, inti shintotaro Asore Jotovakunirira. ²⁰Onti ikañotaari iriri yovetsikakera terira onkametite teranika inkematsateri Tasorintsi. ²³Impogini yogaegiri inampi-naegi isariaiganakari irogaigakerira, impo yogaigakeri anta ivankoku. ²⁶Impo yogaagani imperitanakiku pankirintsishiku paitacharira Osa. Irirrokya pugairi itomi paitacharira Josuashi.

Koveenkari Josuashi

22 ¹Impogini yogari Josuashi itsititanakero ipegakara koveen-

kari ishiriagakotakara 8 shiriagarini. Onti ipegaka koveenkari 31 shiriagarini anta Jerosarenku. Ogari iriniro onti opaita Jerira, inti shintotaro Araia Vosekatekunirira. ²Irirori onti ikematsa-tasanotakeri Tasorintsi ikañotasano-takarityo Iravi ikematsavagetirira itsataga-getirora magatiro ikantagetirira.

23 ²⁵Teratyo intimumate pashini koveenkari kañotakemparineri-rira irirori ikematsatanovagetakerira Tasorintsi itasanovagetakarira, aikiro isuretasano-takarira ipaniro-tasanotanake-rira ikematsatakerira itsatagasanotakero-tyo magatiro itsirinkakogetanakerira Moiseshi. ²⁶Yogari Tasorintsi ineaveta-karityo ikañotakara maika, kantanki-cha teratyo irapitsimareaempa, pairotari yotsimaasanovagetakeri Manaseshi teratyo imagisantero, ²⁷ontityo ikantake: “Nokaigakerityo aikiro iyashikiiganake-rira Jora nonkañotagaigakemparira itovaireegi, novashigantanakemparoty Jerosaren ontiri aikiro novanko nokanta-vetakarira nontimantakemparora.”

²⁹Impogini aiñokyara ipega koveenkari Josuashi, yogari igoveenkariegite Ejipitokunirira paitacharira paraon Nekao iatake Eoperateshiku irimutakota-kerira igoveenkariegite Asuriakunirira yomanatakara. Impogini iatake Josuashi irirori iromanatakemparira, kantanki-cha iroroty ineavakerira Nekao yogavakeri-tyo anta Megiroku. ³⁰Impo yogari inampinaegi yomatetantaiganaari ishigakotantarira yamaiganairira Jerosarenku yogaigairira imperitanakiku yovetsikashitunkanirira. Impogini yogaegiri iyashikiiganakerira Jora ikaemaigakeri itomi paitacharira Joakase isaguigakerira aseite ipegakagaigakarira igoveenkariegite ipugairira iriri.

³¹Antari itsititanakerora Joakase ipegakara koveenkari onti ishiriagako-taka 23 shiriagarini. Impo ipegavetaka

koveenkari mavani kashiri anta Jerosarenku. Ogari iriniro onti opaita Amotare, inti shintotaro Jeremiashi Iri vanakunirira. ³²Yogari Joakase onti yovetsikake terira onkametite ikañoigakarira yashikiiganakeririra tera inkematsaigeri Tasorintsi. ³³Impogini yogari paraon Nekao yamanakeri Iriveraku anta Amateku yashitakotagantakerira ganiri ipegaa koveenkari Jerosarenku, impo ikantaigakeri maganiro iyashikiiganakeririra Jora impaigakerira 300,000 korikimenta yovetsikantunkanirira perata, intiri aikiro 3,000 korikimenta yovetsikantunkanirira kori. ³⁴Impo irirokya ipegakagaka koveenkari irirenti Joakase paitacharira Eriakime, irirotari itomi Josuashi. Impo ariokya ipaitairi Joasume. Yogari Joakase onti yamanakeri Ejipitoku impo ario ikamake kara. ³⁶Antari itsititanakerora Joasume ipegakara koveenkari onti ishiriagakotaka 25 shiriagarini. Impo ipegaka koveenkari 11 shiriagarini anta Jerosarenku. Ogari iriniro onti opaita Sevora, inti shintotaro Peraiashi Iromakunirira. ³⁷Irirori onti yovetsikake terira onkametite ikañoigakarira yashikiiganakeririra tera inkematsaigeri Tasorintsi. ^c

**Ipokashitakerira Joasume
Navokoronosore**

24 ¹Antari aiño kyara ipega koveenkari Joasume ipokashitakeri igoveenkariegite Vavironiakunirira paitacharira Navokoronosore impo yagaveakeri ovashi yashintakari mavati shiriagarini. Kantankicha impogini ipugatanakari. ²Impogini yogari Tasorintsi itigankimoigakeri pashini soraroe gi

karereoe gi intiegiri surioe gi intiegiri moavitae gi intiegiri aikiro amonitae gi iromanataigakemparira impogere ai gakerira, okaño tasanotanakaroty o ikantaigakeririra kamantantaigatsirira ikamantantai gakerora. ³Onti okaño taka maika, irirotari kisashiigakeri Tasorintsi ikogakera iokaigakerira parikoti. Onti ikenkiagavii gakeri yovetsikagisevagetakerira Manashi pairani, ⁴ontiri aikiro yogaigakerira kogapage tovaini terira tatoita irovetsikumaige kameti inkamaigakera, neroty teraty inkoge Tasorintsi imagisantaerora. ⁶Impo ikamanai Joasume irirokya pugairi itomi paitacharira Joakin.

Yamanunkanira Joakin Vavironiaku

⁸Antari itsititanakerora Joakin ipegakara koveenkari onti ishiriagakotaka 18 shiriagarini. Onti ipegavetaka koveenkari mavani kashiri anta Jerosarenku. Ogari iriniro onti opaita Neoseta, inti shintotaro Erenatan Jerosarenkunirira. ⁹Irirori onti yovetsikake terira onkametite ikaño takerira iriri.

¹⁰Impogini yogari Navokoronosore igoveenkariegite Vavironiakunirira itigankaigakeri isoraroegite iromanataigakemparira Joakin ovashi ipokaigake yomanataigakarira yonkuatakoigakarira, ¹¹impo ipokake Navokoronosore irirori. ¹²Antari ikemakotavakerira Joakin pokapaake iatake itonkivoavakarira ipimantakara tsikyata irirori itentanakaro iriniro intiegiri ironampiriae gi intiegiri itinkamie gi iserae eegi intiegiri aikiro inampinae gi. Yogari Navokoronosore yagaigavakeri. Irirori atake ishiriagakotana 8 shiriagarini ipegakara igoveenkariegite Vavironiakunirira.

c 23.37 Antari aiño kyara ipega Joasume igoveenkariegite iyashikiiganakerira Jora yogari kamantantatsirira paitacharira Jeremiashi itsititanake ikamantantakera. Irirori ikamantantake kigonkero yamaiganunkanira koveenkari Serekiashi intiegiri maganiro iyashikiiganakerira Jora Vavironiaku. Kamosotero *capítulos* 24 ontiri 25, ontiri aikiro sankevanti paitacharira “Jeremiashi”.

¹³Impo yamagetanakeri perata intiri kori nagetatsirira ivankoku Tasorintsi intiri aikiro nagetatsirira ivankoku koveenkari. Itimporokagetakero magatiro nagetatsirira ivankoku Tasorintsi yovetsikagetakerira koveenkari Saromon pairani yovetsikantakarira kori, ariotari ikantakeri Tasorintsi onkañotakempara maika. ¹⁴Impo yamageiganakeri timaigatsirira Jerosarenku. Yamaiganakeri itinkamiegi intiegiri soraroegei suraritasanoigankitsirira. Imaiganakeri aikiro govageigatsirira yovetsikavageigira posantepage intiegiri aikiro pitankamenivageigatsirira. Maganiro ikaravageigaketyo 10,000. Teraty tyani timumataatsine, intaganityo timageigaatsi terira impaitumaigempa. ¹⁵Yamanakeri aikiro Joakin ontiri iriniro ontiegiri aikiro itsinanetsiegite. Imaiganakeri aikiro inampinaegi intiegiri maganiro itinkamipage iyashikiiganakerira Jora. Maganirosanoty yamaiganakeri Vavironiaku yashintaigakarira.^d

¹⁷Impo yogari Navokoronosore pashinikya ipegakagaka koveenkari anta Jerosarenku. Inti ipegakagaa igokine Joakin paitacharira Mataniashi, kantan-kicha ariokya ipaitairi Serekiashi.

¹⁸Antari itsititanakerora ipegakara koveenkari onti ishiriagakotaka 21 shiriagarini, impo onti ipegaka koveenkari 11 shiriagarini anta Jerosarenku. Ogari iriniro onti opaita Amotare, inti shintotaro Jeremiashi Iriwanakunirira.

¹⁹Yogari Serekiashi onti yovetsikake terira onkametite ikañotakarira Joasume.

Yamanunkanira Serekiashi Vavironiaku

²⁰...Impogini yogari koveenkari Serekiashi ipugatanakari Navokoronosore.

25 ¹Impo agakara 9 shiriagarini ipegakara koveenkari Serekiashi yaganakara kashiri 10 ogari kutagiteri 10, ipokashitakeri Navokoronosore itentaigakarira maganiro isoraroegeite yonkuatakoigaarora aikiro Jerosaren ²kigonkero aganakara 11 shiriagarini ipegakara Serekiashi koveenkari. ³Impo yaganakara kashiri 4 ogari kutagiteri 9 agaveasanoiganakeri itasegane timaigatsirira Jerosarenku, itsonkatakotasanoiganakatari isekaegi. Mamerisanoty tatampa irogaigaempa. ⁴...Impo yogaegiri manataigacharira ishiganinkaiganaka tsitenigetiku. ... Imatanaka koveenkari Serekiashi irirori iatakera oatara Aravaku. ⁵Impo yogaegiri kareroegei ipatimaiganakerityo yagaigavakeri pampaku Jerikoku yogishigageigakerira maganiro isoraroegeite. ⁶Ovashi yamaiganakeri anta Iriveraku ipaigapaa-kerira Navokoronosore. Impo yapatoventaigakari ikantaigakera inkisashitakenkanira. ⁷Impo yogaigakeri intomiegi ikamagutakotakerira. Irirori onti ikitisogitutaigakeri iroki impo yogusoi-gakeri karenatsaku yamaiganakerira Vavironiaku.

Opotunkanira Jerosaren

⁸Impogini aganakara 19 shiriagarini ipegakara Navokoronosore igoveenkari Vavironiakunirira yaganakara kashiri 5 ogari kutagiteri 7, yogari inampina Navokoronosore paitacharira Navosararan iatake Jerosarenku. Irirori inti itinkami soraroegei sentaigiririra Navokoronosore. ⁹Antari yogonketa-kara Jerosarenku ipotakero ivanko Tasorintsi ontiri irashi koveenkari. Imagetakero aikiro magatiro pankotsipage, irrosanoty oga omarapageni

d 24.15 Antari yamanunkanira Jerosarenkunirira Vavironiaku itentagantunkani kamantantatsirira Iraniere. Kamosotero Iraniere 1.

kameti getankitsirira. ¹⁰Yogari soraroegi itentaigakarira ituageigakero otantatsaitakotantarira Jerosaren. ¹¹Yogari Navosararan ipogereaiganakeri maganirosano timaigankitsirira Jerosarenku yamaiganakerira Vavironiaku irashintaigakemparira koveenkari, ... ¹²intaganivanisanotyogaiganai terira impaitumaigempa intsamaivageigaera, aikiro intsamaitakoigaerora ova. ¹³Yogaegiri isoraroegite iaigake

ivankoku Tasorintsi itimporokageigakerora otinkamipoapage ontiri aikiro opirinitantagetarira tasopage. Magatiro okapage onti ovetsikantunkani verontse. Itimporokaigakero aikiro omarane opitakoatantakarira nia ikivakotantaigarira saseroroteegi yovetsikakagantakerira Saromon pairani ovetsikantunkanirira verontse. Yogari verontse yamaiganakeri Vavironiaku.